



наведи телефон

Луимә СЭрипос

19.12.2024
№ 24 (1330)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru

Мән ӧлнэ мӧв янытлавес



Я. Семёнов вӧрум хури

Вӧт сӧграпнал ӗтпос 10 хӧталэ – мӧн округув мӧгсыл щар мӧк яныг ялпың хӧталыг ӧлы. Ты кастыл Ханты-Мансийск ӱст сӧв мир акван-атыглаве. Ань яныг кӱщайт, мӧ-вӧй нӧх-винэ мӧхум, сӧв нӧврамың щӧмьят, хӧнтлын мӧн ялум хӧтпат, мӧньщи ос ханты мӧхум «Югра-Классик» нампа колн вӧвыглавӧсыт . Ты урыл 2 лӧпсыт ловиньтӧн.

Ты номерт ловиньтӧн:	Мӧн ӧлнэ мӧв янытлан хӧтал ▶ 2	Тӧнут-пормас суссылтавес ос тыналавес ▶ 4	Сосса мирыт китыглавӧсыт ▶ 5
Ловиньтан нӧпакыт хурил пӧслыанэ ▶ 7	Оматӧ сӧлыңколт яныгмас ▶ 10-11	Ӧгирищит-пыгрищит ялпың хӧталыл вӧрыглавӧсыт ▶ 14	Хум сосса нӧврамыт касуңкве ханищтыанэ ▶ 16

Мән ӧлнэ мӧв янытлан хӧтал

Вӧт сӧграпнал ӧтпос 10 хӧталэ – мӧн мӧгсылув шар мӧк яныг ялпың хӧталыг ӧлы, 94 тӧл ювле хультум порат, 1930 тӧлт, мӧн мӧв Ханты-Мансийский автономный округ намыл пинвес, ты ӧлы-пӧлт тав Остяко-Вогульский округыг лӧввес.

Кӧсың тӧл ты ялпың хӧтал кастыл Ханты-Мансийск ӱст сӧв мир акван-атыглаве. Ань ос «Югра-Классик» намба колн яныг кӱщайт, мӧ-вӧй нӧх-винэ мӧхум, сӧв нӧврамың щӧмьят, хӧнтлын мӧн ялум хӧтпат, мӧнщи ос ханты мӧхум тув вӧвыглавӧсыт.

Ӗвыл янытлан лӧтың округ кӱщай **Руслан Николаевич Кухарук** лӧ-выс. Тав татем сымыңыщ потыртас:

– *Округувт ӧлнэ ятил мир! Ам нӧнан ты ялпың хӧтал кастыл янытлыя-нум. Ты хӧталт мӧн мӧв мӧгсыл сӧв рӱпитам, сӧв ӧр пинум мӧхум номыл-матыглӧлыянӱв, тыг ӧл-мыгтам ӧвыл мирыт янытлыянӱв.*

Пӧс йис порат тӧн тыг ӧлуңкв ӧхтысыт, тыт тӧн щӧмьяныг, нӧврамыңыг ӧмтсыт. Та пӧсныл мӧн мӧв мирыңыг та ӧмтыс.

Ты йист мӧнщи, ханты лӧтңыг ӧлӧль тотнэ мӧ-гыс сосса хӧтпат сӧв рӱ-питӧгыт, тӧнти пӧс вӧр-мӧляныл, пӧс наканыл ӱргалым ӧнӧщияныл. Тӧнанылн тыи мӧгыс мӧн яныг пӱмӧщипа лӧтың лӧвӧв. Ос ань яныгман нӧврамытн ты тӧла акв-тыхольт ӧмӧщакв ӧлӧль вос тотаве.

Яныг хӧнтын ялум хӧтпат, мӧ-вӧй мӧныл нӧх-винэ мӧхумн, ань хӧнтлын хум хӧтпанувн тӧнаныл пуссын янытлы-янӱв. Тӧн тӧнтинӧныл ат

сӧлитым мӧн ӧлнэ мӧв вуянтыяныл.

Кӱщай потыртаме юи-пӧлт мӧхум янытлаңкв та патвӧсыт. Ӗвлӧт СВО мӧт хӧнтлам хӱрум ху-мыт наманыл лӧввӧсыт. Россия Президент хӱлтнэ нӧпаке щирыл тит хумыг, ты Михаил Ушаков ос Руслан Суктубаев, «Орден мужества» намба мӧглын тагатаң пӧсыл майвесӧг, акв хум Сергей Дмитриев – «За отвагу» мӧталил.

Тӧн пуссын сакваты-мат, акв хум сака нӧхи, акватӧ кӧтӧ сакватым ӧлы, мӧт хум ос пуңкӧн нӧя хӧям. Тӧн янытлыманыл порат мир пуссын нӧх-лӧльсыт, тӧнанылн мат-тем кӧтпатта та рӧтсыт.

Та юи-пӧлт мӧт яныг кӱщайт мир нупыл потыртасыт. Ӗвыл округ кӱщай Александр Васильевич Филипенко тӧтум лӧтңанэ ань ӧс ловинь-тавӧсыт.



Кӱщайг ос сосса мӧхум аквӧт пӧслахтасыт



Сӧв нӧврамың Никитин колтӧгыл янытлаве

Тувыл Руслан Кухарук сӧв нӧврамың щӧмьят янытласанэ. Никитин щӧмья Ханты-Мансийск ӱст ӧлы, нӧг-хумыг аквӧт 28 тӧл ӧлӧг. Тӧн хӱрумхуйплов нӧврам ӧнӧщӧг, яныг ӧгитӧн 27 тӧлӧ тӧвлыс, пити патта ӧгитӧн – ат тӧлӧ. Щӧня-ныл ань «Мать-героиня» намыл майвес.

Олег ос Марина Буневыг Нефтеюганск ӱст ӧс сӧв тӧл аквӧт ӧлӧг, тӧн хӧт нӧврам ӧнӧщӧг. Нӧг-хумыг ань сас янытла-весӧг, хум «Отцовская слава» мӧталил, нӧ ос «Материнская слава» намба мӧталил майвесӧг.

Антонина Роговенко ос «Родительская слава» мӧглын тагатаң пӧсыл янытлавес, тав ат нӧврам ӧнӧщи. Та юи-пӧлт иң сӧв хӧтпа округ губернатор пӧлыл янытлавӧсыт, сӧ-выңпӧлӧ пуссын яныг намыл майвӧсыт.

Тувыл мир ӧлы-пӧлт артист-хӧтпат ӧргысыт, йиквсыт. Акв ӧги «Тов-лыңӱит» намба ӧрыг ӧрг-уме порат мӧхум пуссын нӧх-лӧльсыт, тӧва нӧквет самвитаныл нӧглысыт.

Ты ӧргыт СВО мӧт хӧнтлын хум хӧтпат урыл ӧргаве, тӧваныл порс-лыма юи-пӧлт товлыңӱиг ӧмтӧгыт ос нӧх та ты-ламлӧгыт. Ты ӧрыг омаг-ӧгийг Евгения ос София Олареско тӧн хансытӧн.

Ханты-Мансийск ӱст «Млада» намба ӧргын коллектив ӧлы, та нӧквет ӧс татем сымыңыщ ӧргысыт. Акв ӧрганыл тох намаим ӧлы – «Жду. Люблю. Югра», тот нӧквет ӧс хӧнтлын хумыт урыл ӧргӧгыт, тӧн ӧкванылн, нӧвраманылн хумус юв ӱравет. Тамле ӧмас ялпың хӧтал ты ӧлыс.

Валентина
ВАСИЛЬЕВА

Това сакконытн йильни латың хултэгыт

Округ Дума депутаты ты этпост 24 хоталэт юи-овыл щес кит сапранияг ёмтэг. Ос ты элы-палт тан янас акван-атхатнэ комиссият савсыр сакконыт уральтым матыр хултнэ латың вәрэгыт.

Ань мирн нётнэ тэлат уральтан комиссия ат сакконопроектит ос кит вәрмалиг урыл потыртасыт. Тув хултыглым латыңыт тот пуңкотнэ хум урыл Василий Филипенко Дума сапрәнит элалы тах потырты. Тан савалап няврамыт опека ос попечительства тэлатыт эрнэ нэпаканыл щёпитан порат ос няврамыт ошнэ колн кётнэ магыс мирколт рупитан кўшаит ос пёриян латың вос ошнувыт.

«Югорский семейный капитал» олның нэпаканыл нявраманыл магыс тувыл нэмхуныт олн щар

ат вуйлум щёмьят мотыт тал 10 000 солкөви виңкве вос вёрмысыт. Ты коныпал сакконытыт махум пусмалтан тэлат ос кол унттын порат уркуптан вәрмалит тарапаттувёсыт ос това ат эрнэ латыңыт хот вос щуртумтавет. Тувыл няврамыт ханищтан кол мус олн ойтнэ тал миннэныл урыл ос потыртасыт. Ань пуссын хултнэ латыңаныл Дума сапрәнияг тах лавияныл ос элалы пирмайтыяныл.

Ма-вит ўргалан, экономика, промышленность ос предпринимателит

тэланыл мот комитетит ос рупитасыт. Пуңкотнэ хум Сергей Великий тот махманэ ёт сат тэлат уральтасыт. Тан туризм, ма-вөй нөх-винэ мат хотьютанылн уральтавет, ма-лөмт ошнэ нак – ань ты сакконыт пуссын мўсхалыг арталавёсыт ос эрнэг щёпитавёсыт.

Тувыл колыт хот-щёпитан Югорский фонд сав накла колыт унттын юипалт тананыл уральтаңкве ос вос вёрмысаныл. Ётыл тан та коланыл манараныл лөльсаң олы – тара-паттавет ос ёмщакв щёпитан пораныл ванэг оныцияныл тах.

Самын патум няврамаквет тосам щаквитыл тэлыгтан тэнут овылтыт Лариса Белоцерковцева потыртас. Ань манхурип

тосам щаквитыт эрэгыт, ты тэлат пуссын тарапаттувёсыт. Мөблал миркол нётмил палыл Советский районт тамле тэнут вәрнэ кол унттуңкве патвес, тав 2025 талт туи рупитаңкве тах овылтахты.

Ётыл мот комиссият ос акван-атхатэгыт ос округ дума сапрәнит сакконын хултнэ латың лавёгыт. Таит пирмайтаңкве рөви манос ати, депутатыт тованакт воритотэгыт. Овлэт тан ос мот мүй махмыт элы-палт округ губернатор Руслан Кухарук послание-латың хултлэгыт.

Округ Дума ищхипың лөпсэт хансым ляххал маньши латыңыл **Тамара МЕРОВА** толмашластэ

Мав вуянтан хотпат номавет

Ты этпост Россия ўргалан ос мирыт сөтыңыг-щуниңыг элалы оленэныл магыс янытлан хоталыт оләгыт. Тан яныгщ хонтлан мат порсум махум кастыглан магсыл варавет.

Хурмит щислат наманыл ат ванэ салтатыт кастыглан хоталыг олы. Хонтлам мат порсум хотпат памятникын касың усыт махум хорамың лүптат тотэгыт. Ханты-Мансийскат округ губернатор Руслан Кухарук мот кўшаит ёт тамле ўсканын ялсыт, лүптат тув пинсыт ос астал лөляхөлсыт.

Атыт щислат мирн нётмил вәрнэ хотпат янытлавет, мот щирыл тан волонтерыг манос добровольцыг лававет. Ань Ханты-Мансийск уст 85 арыгкем сыресыр нётмил вәрнэ колыт оләгыт, тув 7 сөтыра 800

янге-мане элумхөлас ялантэгыт. Та хоталт ўсувт СВО магыс нётмил вәрнэ махум эрнэ рупата вәрнэ магыс янытлан нэпакыл майвёсыт. Тан халаныл «Шьём для наших», «Сбор ХМ», «Сушилочка» сав волонтерыт ос предпринимателит олысыт.

Татьяна Тихон «Доброволец (волонтер) Югры» магылн тагалан пөсыл мүйлуптавет. Тав хонтлан мат порслым пыгыт щаняныл Советыт пуңкоты. Татьяна Владимировна Антон пыге Чечня мат лусытас ос тот порславес. Ты этпос онтоловит хоталэ «День героев



Т. Тихон янытлан нэпакыл мүйлуптавет

Отечества» намаим олыс ос аквхуйплов щисла Чечня хонтлам мат порслым хум хотпат кастын хоталыг олы. Ты пыгыт щаняныл акван-хонтхатыңласыт, тан суссылтап вэрыгласыт ос ўскант оленэ памятникын хора-

мың лүптат тотсыт ос тув пинсыт.

Хонтлын мат ляххал тотым порсум хотпат ахуйплов щислат ос кастын хоталаныл олы. Россият оленэ махумн тан пуссын ат ёрувлавет.

Тамара МЕРОВА

Тэнут-пормас суссылтавес ос тыналавес



Округ кўшай Р.Н. Кухарук мэхум ёт пöслувес

Вят сáграпнал этпос 8-10 хөталытт Ханты-Мансийск үсн тэнут-пормас тыналан мэхум ёхталасыт. Ты вэрмаль руш лätңыл «Товары земли Югорской» лававе. Округ янытыл сáвсыр маныл тәнки рүпата вэрнэ китсät арыгтем хөтпат тэнутаныл ос пормасаныл тыналаңкве ёхталасыт. Төва хөтпат тыналан утаныл «Югра мät вэраве» нампа пöсыл ханлым блэгыт.

Ты тэла округ мирколт рүпитан мэхум тән элаль тотыяныл. Ты тыналап 1995 тäl пäsныл вáрыглаве. Тот нёвиль, хул, щаквитың тэнут, нянь, пил ос мөт сáвсыр тэнут тыналаве. Хүрум хөтал рүпитанэныл сыс тув сáв мэхум ёхталасыт. Кáсащан хөтпат тот тэнутыт äрталаңкве вёрмысаныл ос тәнки мágсыланыл матыр ёвтсыт. Округ губернатор **Руслан Николаевич Кухарук** тув öс ёхталас. Тав лáвыс:

– Ты тыналан мán кáсың тälныл öс сáв хөтпа ёхталаңкве патыс. Төва районытныл кўшаит тәнки хөтпаныл öс уральтасаныл. Ань тыналахтын мэхум мáгыс сáв нётмил вэраве. Мán кáсың тäl ты тэла щёпитälэв. Югра мáвт манхурип тэнутыт вэравет, мөт мät блнэ мир öс вос вáгыт, ты тэнутыт эл тотыглаңкве öс

патэв. Тыт тэнут äрталан ос ёвтнэ коныпал, ёхтум хөтпат ёт потрамаңкве рöвыс.

Тувыл «Российская система качества» нампа организацият кўшай вáңын нэ Елена Александровна Саранцева потыртас. Тав лáвме щирыл, мөлты тäl Югра мät тыналахтын хөтпат государства пáлыл нётыманыл щирыл, тән китыт места висыт. Мán округувт вэрнэ төва тэнутанув мөлты тäl Китай мät блум выставкатыт тыналавёсыт. Ты вэрмаль сака ёмас.

Ханты нэ пил тыналас

Мария Ивановна Игишева Белоярский район Касум пáвылныл ёхталас. Тав саңквлыпил, сүйпил, сáвни, тáхтпил, морах, сорт хул, кáсэв тыналас. Ань ты порат мощца хул ёт-тотыглас. Ты коныпал сáсныл хорамың сáс тө-

тапыт вэри, ханты супыт ос мөт пормасыт юнты. Сорт ос сыг совныл хурыгсовыт юнты, ты пормасыт мэхум лáщал ёвтэгыт.

Тав «Ильбигорский» нампа щёмьяң община кўшаиг öлы. Ты община хоса порат вэрсаныл кос, ос матахмат тäl ат рүпитас. Ётыл 2011 тälт нэпакыт мўсхалыг щёпитасаныл, ушта элаль рүпитаңкве патсыт.

Помут пáвылт онтоловхойплов ханты щёмьяң öлыс. Пёс порат тот кол-

яныг пиркáта öлыс. Хум хөтпат Ас ят хул алыщласыт. Та порат сáв хул öлыс, мэхум супыг, мохсаң хул пувыгласыт.

Мария Ивановна кит пыг янмалтас. Тэнань янас щёмьял блэг, сас Белоярский үст рүпитэг. Ущлахтын хөталыт оматэнан нётуңкве акваг ёхталэг. Вöраян колэн ялантэг ос хул алыщлэг. Туи щёмьяң тáгыл пил вätэгыт.

Мария Ивановна öйкатэ руш хум, тав öс пыганэ ёт



Р.Н. Кухарук ос М.И. Игишева

хоз öлыс, ётыл мисыт мөт яныгнув пáвылн аквантотвёсыт. Мэхум пуссын Касум пáвылн вántлысыт, туп пенсия-олн винэ яныгпала хөтпат культсыт. Ёты-öвылт Мария Ивановна äтятэ ёт та пáвылт община вэрыс. Тән колтáгылт нёлолов няврам яныгмасыт, пáвылн пуссын ёхталэгыт. Пёс порат тот мэхум сáлыт мощ öщсыт. Ань щёмьяныл ёт тот хул алыщлым, вöраим ос пил вáтым блэгыт. Ты пáвыл Касум ляпат үнлы.

Нэ лáвме щирыл, сáртын мэхум тот сáв пил вáтыгласыт. Пиланыл йив пўщка кйвырт öщсаныл. Та пиланыл вертолётыл эл тотвёсыт. Тувыл кит

вöраим ос хул алыщлым яласы. Экватэн сосса вэрмалитн ханищтавес. Ань хум пенсия-олн вуим öлы.

Мария Ивановна тыналан колнакён округ кўшай хум Руслан Кухарук щалтапáлыс. Китыглахтас, тыналан мáгыс нэ маныр ёт-тотыс. Руслан Николаевич öпаге-щашёквaге Касум пáвылныл блсйг, тав мánиг öлмёттуи порат тот яныгмас. Хум сосса мэхум нупыл ёмас номтыл öлы. Тав ханты нэкве ёт мощ потрамас, пормасытыл пўмщалахтас ос элаль та минас.

Николай
МЕРОВ

Сосса мирыт китыглавёсыт

Елена Пивнева, Москва ўст Н.Н. Миклухо-Маклай намба РАН институтт этнология ос этнография тэлат пуңкоттнэ нэ, тынакт Ханты-Мансийскан ёхталас. Тав Мә-вит ос Элумхөлас музейн ханищтапн вöвиньтälвес.

Елена Анатольевна сәр тälытыт мәнщиит ос хантыт палт осн-паттым тэлат хултыс. Ань маныр öвылтыт тот потыртасыт, тав мәнвн тох лавыс:

– Ам нән округн ёхталанэм сыс мәнщи ос ханты хөтпат пёс наканыл урыл китыглыя-нум. Янгыщ äнунм таи пүмыщ – ань ўсн вәнтлам хөтпат пёс мähманыл вәрум накыт вäганыл манос äти, тәнаныл элалэ тотыяныл ман хот-ёрув-ласаныл. Тамле тэлат мирхал наука рүпитан колт, руц щирыл «научный центр мирового уровня», ёмщакв ханищ-тасанүв, äрталасанүв ос ханищтап порат ам ты урыл потыр ловиньтасум.

Сосса мир вәрмалит институтыт ханищтан щирыл тэлат хумле öлэгыт, тувыл сосса элумхөлас такви хумус номсы ос маныр вäри, та потрумт пуссын хассанум. Ань тыг мус нән палтын ёхталанэм порат тамле тэлат элалэ ханищтыянум, мәнщи ос ханты хөтпат öлупсаныл хумус пентхатас ман äти. Хоты щёмьятн пёс накыт мähкыт элалэ тотавет – тьи туп сосса мähум колтägлыт. Мөт национальность хөтпа ёт акван-öлуңкве минэгыт ке, ос щәнэ лätнаныл, пёс наканыл та ёрувлыяныл.

Ты ханищтапт öвыл хөталэт руц щирыл лävнэ «междисципли-

нарность» мәнвн сака мустыс, ты наукат сävсыр ханищтан тэлат учёныит пуссын акв мән атавет ос тән тәнки тäра-паттум тэланыл урыл потыртэгыт, матыр эрнэ вәрмалит хултэгыт. Туп таи саль, ётыл тән пуссын янас колнакт лäkквa-атавет ос тот рүпитэгыт, таимähгыс тöва вәрмалит вätал öлэгыт, маныр учёныит лävөгыт, öс ат вäганүв. Ос хотты ёмталан халт, акван-хөнтхатнэв порат матыр китыглэв ос мәнки халувт воритотуңкве вөрмөв. Төнт сävсыр номтың вәрмалит вäңкве сака ёмасыг öлы.

Ам ань томский учёныит потраныл хунтлуңкве сака тахсум, тән 1990 тälыт мәнщиит палт ялсыт ос генетика тäра-паттын рүпата вäрыгласыт. Мән туп мәнки секциявт потырт хунтлысүв ос тöванакт ам антропология урыл вäти кина сунсуңкве мөт колнакн щалтапälсум.

– Нән рүпитан колнакынт маныр öвылтыт потырт сака пүмщиг öлсыт ос нәнки халынт воритотсын?

– Мән «Этнографические исследования населения Югры и сопредельных территорий» намба секциявт Татьяна Волдина-Ледкова ос Наталья Тучкова пуңкоттсбг. Тот сävсыр музейт рүпитан хөтпат ос учёныит сосса мир пёс



Е.А. Пивнева



Е.А. Пивнева наука щирыл рүпитан мähум ёт

наканыл ос Төрүмн, Нäй-Öтыранылн пöикщан öвылтыт потырт ловиньтасыт.

Екатеринбургныл ёхталам хум Илья Абрамов ловиньтам потре юипälт мähум хоса воритотсыт, насати, ханты мähум нефтяникыт ёт мävöй нöх-винэ мәнаныл мähгыс сутытахтэгыт. Тувыл Татьяна Александровна Молданова этнография мähгыс ханищтан пормасыт öвылтыт сäv китыглавес. Ань сосса мähум пёс наканыл, щәнэ лätнаныл ты йильпи порат хумле öлэгыт, ань тыг мус учёныит пүмщалым öньщавет.

Акв хөталт Елена Пивнева мән рүпитан редакция колувн вöвиньтälыслүв ос сävсыр вәрмалит öвылтыт потыртасыт. Тав

мәнвн китыгластэ, мән ань ўст öлнэв мähгыс мәнкинäv ўсың хөтпаг ман пävлың хөтпаг ловиньтыянүв. Тувыл ўст öлнэв сыс пёс накыт элалэ тотыянүв манос хот-ёрув-ласанүв, щәнэ лätнун вярманувн ханищтаве манос манрыг тән ханищтаңкве ат кäсашөгыт.

Елена Анатольевна тöва ювле лävум лätнунувн оцатахтым öлыс, сäv тäl ўст öлнэв сыс мән элалэ пёс мähманув щирыл номсахтэв, щәнэ лätныл потыртэв, йир вäрыглэв, пүрлахтэв. Пёс накыт тотнэ кастыл, Нäй-Öтыранув ос пупганув нупыл пöикщим пустагыл ос посуң номтыл элалэ öлэв.

Тамара МЕРОВА

Өлнэ мätев янытлылүв!

Ты этпос 9 хөталт Хальүс район Саранпавылт нэпак ловиньтан колт «Литературная гостиная» тэла вэрыгласүв. Ань ват сáграпнал этпос 10 хөталт Ханты-Мансийский автономный округув 94 тälэ тöвлыс.

Ты кастыл мán, потрыт ос стихыт хаснэ хөтпат, акван-атхатыгласүв, стиханув ловиньтасанүв. Пáвлувт «Золотистая верба» творческий объединение кол öлы, мán пуссын тув ялантэв, тэланув урыл халанувт потрамөв.

Нэпак ловиньтан колт рүпитан хөтпат мирн вánэ писателит ос поэтыт öвылтыт потыртасыт – Андрей Тарханов, Еремей Айпин, Маргарита Анисимкова, Юван Шесталов ос мөт мэхум урыл.

Атхатыглам хөтпат

халт народный поэт, член Союза писателей России Владимир Квашнин öлыс, тав яласам лёнханэ урыл потыртас, «Золотой корень» стихе ловиньтастэ, «Живая вода» нампа йильпи нэпаке урыл аквит латын лавыс.

Ам, Галина Николаевна Ларионова, «Золотая верба» творческий объединение кол тармыл пуңкотым öлэгум. Та хөтал ам йильпи стиханум ловиньтасанум, Ханты-Мансийск үст öлум финно-угорский писателит

конференция урыл потыртасум. Тувыл атхатам мэхманумн «Поэзия и проза финно-угорских и самодийских народов» нэпак суссылтаслум, 2023 талт таратавес. Тув ам мánьщи лätңыл хансум хурум стиханум түлвөсыт: «Тының мәтем», «Туйт, Туйт» ос «Пыгтем хул тотыгпас».

Нэпак хаснэ мánьщи нэ Светлана Динисламова мánавн «Моя Сосьва река» нампа йильпи нэпаканэ кётсанэ, төват библиотекан ос краеведческий музейн мүйлуптасанүв.

Ты хөнтхатыглапув ойгпаме элы-пэлт, Марина Керцер «Тропинка к счастью» нампа стихе ловиньтастэ, тав öс «Золотистая верба» колн яланты. Мán татем ёмашакв үнлахöлсүв, сымыңыщ потрамасүв, стиханувт ос потранувт öлнэ мätев янытласлүв.


Галина ЛАРИОНОВА
Хурит акван-атхатыглам
нэпак хаснэ мэхум
пöслым öлэгыт



Галина Николаевна Ларионова
– мánьщи нэ, 1962 талт Хальүс район Сүкырья павылт самын патыс.

Тюмень үст öлнэ культура ос искусство академия-колт библиотека тэлан ханищтахтас. Саранпавылт библиотекат 20 арыгтем тал рүпитас, 13 тал тот күщаиг öлыс.

Ань пенсият öлы, стихыт ос потрыт хансы. Тав хансыглам стиханэ «Жизнь Югры» Хальүс район газетат ос «Лүймә сәрипос» округ газетат хансыглавөсыт, тувыл «12 самых лучших стихотворений» венгр, эстонский, финский, саран ос мөт лätңытыл хансым антология нэпакт мánьщи лätңыл хасвөсыт.



Ловиньтан нэпакыт хурил пöслыянэ



Н.М. Талигина потыртты

Ханты нэ Надежда Михайловна Талигина Ямало-Ненецкий автономный округт Салехард үст öлы. Тав пёс йис вэрмалит элаль тотнэ наукат кандидат нам öньщи. Ань катыл хурит пöслым такви рүпата вэри, савсыр сосса мир пормасыт мащтырлы.

Мöлал Ханты-Мансийск үст «Райшевские чтения» нампа конференция öлыс. Нэ хöтпа ты вэрмалын öс ёхталас. Тот тав катыл хурит пöслынэтэ урыл потыртас.

Надежда Михайловна ювле хультум талт сатлов талэ төвлыс. Тöнт тав суссылтап вэрыглас, тот мир магыс хурум тэла урыл лавыс. Öвлэт Уй ййквнэ нак урыл потыртас. Нэ Уй ййквнэ накыт манытагыл вэганэ. Тав ты урыл хоса потыртас ос такви хуриянэ мирн сусылтасанэ.

Та юи-палт «Тэк павыл яныгпала хöтпа эрыг» нампа нэпаке урыл тох лавыс. Ты нэпак таратаме элы-палт, нэ катыл хурит тув пöслыс. Ты эрыг 1898-1899 талыгт Григорий Тарагупта эргыстэ. Ётыл Ева Адамовна Шмидт, учёный венгр нэ, ты эрыг ханты латңыл ёмщакв хансыстэ. Ты учёный нэ ханты ос маныщи латңыл ханищтас, ёмщакв по-

тыртаңкве хасыс. Тав хаснэйвыл хансум нэпак-лöпсанэ Надежда Михайловнан мисанэ. Ань ханты эква ты вэрмалы урыл тох лавыс:

– 1994 талт Салехард үст Ева Адамовна ты эрыг сат хөтал хансыстэ. Рүпататэ астламеюи-палт, такви нэпаканэ анузн мисанэ. Тувыл тав мөт



Г. Райшев пöслум хури пöхат Н.М. Талигина пöслувес

мән та минас. Ам юн ты нэпакыт ловиньтаңкве патсанум.

Анузн тара пүмащиг ёмтыс. Касың хöтпа Тöрум ащин мансавит талыл миве, тав тасавит тал та öлы. Ловиньтэгуз, ам элы-палумт катыт сырай пувим, кер маснутыл масхатым яныг хöнт-капаит лöлөгыт. Тән пуссын карай хул совныл юнтым кентыл пинхатым öлэгыт. Сат ёр хумыт пуссын карсыт, пуңканыл колала мус ёхтэгыт. Ты хансум потрыт ам сы-мумн тара хөясыт, акв-тупмат ам тананыл касаласанум. Тöнт ты пöхатур хöтпат хурииг пöслуңкве номылматсанум.

Ювле хультум талт маныполь этпос ватыт хөталэт Салехард үст нэпак ловиньтан колт рүпитан хöтпат Надежда Михайловна палт свöнитасыт. Ос Юрий Кылевич Вэлла, ёрн хум, хансум нэпаке палт катыл хурит пöслуңкве вöвсаныл.

Нэпак хансум ёрн хум öлме порат Надежда Михайловна Нижневартовский район Варьёган

павылнялыс. Хум сáлыянэ үрнэ мätэн öс ялыс. Тав щёмьятэ ёмщакв вэгтэ, тыммагыс хуритпöслуңкве тара вуйхатас. Хурум нэпаканэт катыл хурит пöслыс. Ань ты нэпакыт таратавёсыт, тананыл нэпак ловиньтан округ колт хöнтуңкве рöви.

Ань ханты нэ ёхталаме порат Геннадий Райшев пöслыглам иң сáвнув хуриянэ касаласанэ. Тав урётыл тох лавыс:

– Геннадий Степанович сáв нётнэ хури мирн хультуптас. Ты хуритыл иң сáв тал махум пүм-щалахтуңкве патэгыт. Матъёмса ханты ос маныщи махманув халт тамле мутраң, номтың, вёщкат хöтпат öлэгыт. Тән мән мирув магыс сáв ёмас вэрмалы вэрёгыт. Сосса пёс йис öлупсав ос öлнэ-хулнэ наканув элаль тотэгыт.

Ань йильпи нотт төва рүпата элумхöлас пент-сыл ищхйпың утыт вэруңкве патэгыт. Ос хöтпа маныр номтыт öньщи, пуңк кйврёт маныр öлы, та тэла нэматырыл хот ат няртумтаве.

Тувыл эква ос ты урыл потыртас. Ань ма-вöй аква маныл нöх-винэ магыс ос ййвыт ёл-яктын хосыт, мätёв вэгталыг паты. Элумхöлас такви-натэ үргалаңкве кос вёрмитэ, ос товлыңуйт, вöруит, хулыт ма-вит пáңктын паттат мощцаг ёмтэгыт. Ты öлнэ наканув элаль тотнэ магыс, ма-витув үргалым öньщуңкве эри, нявраманувн, апганувн сыстамыг вос хульты. Тамле ты ёмас латың ханты эква лавыс.

Мāньщи олупсал пүмщалавёсыт

Хулюмсүнт павылт пёс тāгыл мāньщит блёгыт. Пāвил китгыг уртхатым олы: пāвил алы-өлвэ – мāньщи пāвил, лүй-өлвэ – руц пāвил. Мāньщит коньпал тыт сāvсыр хөтпат блёгыт: хантыт, ёрныт, рущит, хатанит, украинцыт, белорусыт, чувашит, марийцыт, азербайджанцыт ос мөтаныт.

Мāн пāвлувт школа, садик, польница, миркол, Газокомпрессорный станция, вертолёт иснэ мā,

хөт лāпка, акв тэнэ кол ос нянь вāрнэ кол олы. Округ янытлан хөтпалт садик колт няврамыт олнэ мāv



урыл потыртавёсыт.

Мён Мария Тихоновна Двиняниновал ёт Людмила Ивановна Алгадьеван, садикт воспитателиг рупитан нэквен, няврамыт колн вöвиньтавёс-мён. Мария Тихоновна няврамыт мāгыс такви хансум мөйтэ потыртас.

Мөйт наме «Түйтсам ос Раквсам». Потре олыс, хумыс Раквсам ос Түйтсам халэнт воритотсыг. Мария Тихоновна пāвилт ос Хальүс мā тармыл вāнэ хөтпаг олы, мөйт, эрыг, стихотворение, нас потрыт такви хансы.

Людмила Ивановна амщит амщис. Ам ос няврамытын «Няньсакв» урыл мāнь мāньщи мөйт мөйтсум ос амки рупатам урыл потыртасум. Няврамыт ты кастыл ос щё-

питахтым олсыт, мāнки вöрув урыл мāнь стихотвореният ханищтасыт ос такем ёмашаквөг потыртасыт. Ос няврамыт ты кастыл сāvсыр нётнэ хурит пöсламыт, сунсыглан мāгыс воспитателянылн нөх-ханлымет.

Мария Александровна Алгадьева мāнь няврамыт палт рупиты, тав торгылэ олнэ няврамыт кит ос нила тāl янытыт. Тав ос ты хөтпал такви группатэ мāньщи пормасыт суссылтас ос «Витсам» нэпак урыл потыртас.

Ам номсэгум, няврамытын пүмаш олыс, хунь пöхыныл элумхөлас ёхты. Няврамыт пуссын такем ёмшакв хунтласыт. Маныр вāсыт, маныр хулсыт, элалы вāнжк патыяныл.

Анна АЛГАДЬЕВА

Тāl ойгпан урыл мāхум акван-атхатыгласыт

Тāl овилмахтыглы, аквты щёс та холыгпи.

Этпос овилмахтыглы, хөнткөнт –

этпос котылён ёхтум.

Сāt овилмахтыглы, аквты щёс та тахи.

Хөтпал овилмахтыглы, хөнткөнт – кон сатапам.

Такем молях щёс мины, тāлув ты холы. Тāl ойгпан мāгыс ос округу намхөталэ мāгыс Хулюмсүнтың АНО «Точка Росы» мāхум школан акван-атхатыгласыт. Хумыс тāl минач, мансāвит рупата тāl сыс вāрсыт, мөт тālт манхурип рупата вāрунжк патэгыт, тот потыртасыт.

Мөт тāl кастыл акв ийльпи номт олы, тўя порат няврамыт мāгыс, руц лāвнэщирыл, «Культурно-спортивный фестиваль» Тāгт пөхатур вāрунжк. Ты мāгыс мāхум олн-нётмил грант хосытыл хасылтасыт. Ань ўрхатэгыт, олныл мивет ман āти.

Ос тыт потыртасыт, мүйг

ёхтын няврамытын кос нас ёхтын хөтпатн пāвил тармыл маныр суссылтаңкв рөви. Манхурип мāхум тыт блёгыт. Маныр щёл округу оныщи, витэ-вөре манхурипа. Хумыс ят сыстамыг ўргалаңкв, порсыл, пāңкыл ул вос тāгиньтаптувёсыт. Вит, вөр сыстамыг ўрунжк – мāk яныг ос эрнэ рупата.

Ос акв-кит лāтың пāvлың мāхмыт урыл лāvёв. Мāн пāvлувныл ос СВО мāн хум мāхум миначыт, ань тот пилыщмаң мāt хөнтлэгыт. Тыт олнэ пāvлың мāхум ос мөт пāvлыт, ўсыт хольтыл СВО мāгыс аквтох сāvсыр нётмил вāрэгыт.



Ищвеща вāрэгыт

Хөңха кāсащи, библиотека колт ищвеща пāнкат вāрэгыт, осма хўргыт юнтэгыт. Төва хөтпат йти-пāлаг школан ялантэгыт, тот «Душ» хўрыгсовыт ловтхатнэ мāгыс щёпитэгыт. Ос сāvсыр пил, щāй лўпта тöслэгыт, тувыл тув кётыяныл.

Мощ мөлхөталнув мирколт пāvлың мāхум сāvсыр пормас посылкат ат-

сыт, а тум пормасаныл тувыл Югорск ўсн тотсаныл, тот элалы хөнтлан мāн кётавет. Төва порат матыр эрнэ техника ёвтнэ мāгыс олн атэгыт. Тох ты сыме щāргын хөтпа кāсың нёты ос кāсың хөтпа номсы, моляхнув ты вāрмаль ёл вос пöилтануве. Посың хөталыл элалы вос блэв.

Анна АЛГАДЬЕВА



Потрыт хансум мэхум



О. Ефимова

Пёс йис вәрмалит ханищтэгыт

Ты этпос 7 щислат округв янытлан хөтал кастыл Ханты-Мансийск үст соссa мэхум ос сав мөт мир «Нәлми вәтат» нампа колн вөвыглавёсыт. Та колт суссылтап вәрыглавес, рущ ләтңыл «Архивы северного со-знания» намаим блыс. Тот соссa мэхум тәнки пёс йис вәрмаляныл, щәнь ләтңаныл, щәмьяныл, рүтаныл ос мөт тәланыл урыл потыртасыт.

Ханищтапыл вәрыглавёсыт

Ты элы-пәлт таквсы порат кәсащан элумхөла-сыт Ханты-Мансийск үсн ханищтапн вөвыглавёсыт. Ос мәнщи, ханты ос ёрн мэхум тәнки пёс йис вәрмаляныл хумус ханищтаңкве эри, манхурип эрнэ тәла тәнки мираныл мәгсыл вәруңкве рөви, та урыл потыртавёсыт.

Төнт тув 19-52 тәлыт яныт хөтпат ёхталасыт. Ханищтап оигпам юи-пәлт тәнки проектаныл вәруңкве ләввёсыт. Округувт янытлан хөтал кастыл тән ты рүпатаныл әстласаныл ос выставкат суссылтасаныл.

Вәрум рүпатаныл мәгсыл янытлавлёсыт

Мэхум янытлаңкве сенаторыг блнэ ханты хум Александр Новьюхов ёхталас. Тав ләвыс:

– *Ань сав мәншат хөт-пат тыт акван-атхатасыт. Матьёмас, нән нәнки пёс йис вәрмаляныл пүмщалэгын ос сав пёс мүтрат элаль тотуңкве кәсащегын.*

Нэпак хаснэ ханты эква Мария Волдина мэхум ос янытласанэ, сав ёмас, сымың ләтың тәна-ныл ләвыс.

Анёкватэ суп

Ты суссылтап сав хөтпа тәнки вәрум рүпa-таныл суссылтасыт ос потыртасыт. Тән халанылт Ханты-Мансийск үст блнэ нэ Оксана Ефимова блыс. Тав таквсы ханищтапн ос ялыс, ётыл «Апа» нампа проект нэпакн хансыс ос суссылтап кастыл тәлаг щёпитастэ.

Оксана Хәльүс район Хулюмсүнт пәвылт яныг-мас. Тав анёкватэ Зоя Емельянова Адина хора-

мың ханты супе ос төр-сахитэ хансанэ, хорамыт, пәквпалыт ёмашакв ханищтасанэ.

Зоя Емельянова Тэк пәвылт ханты щәмьят самын патыс. Тав ома-тэ Наталья Петровна Новьюхова, такви бпарич намэ Молданова, Ванзеват пәвылныл блыс.

Ётыл хум вәрыс ос Тэк пәвылн вәнтлас. Ты супе тав 1960 тәл порат юн-тыстэ, ётыл такви агитэн Зоян мүйлуптастэ. 2003 тәлт Зоя Емельяновна агитэн Надежда Константиновна Маслован мистэ. Ос юи-бвыл тәлыт тав Оксанан бньщаве. Тав аны ты суп хансанэ, хораманэ, пәквпаланэ пөслысанэ ос мәнь откритка-нэпак тәратас.

Суссылтапн ёхталам мэхумн **Оксана Ефимова** ләвыс:

– *Ам ты рүпата вәрим тамле тәлат тәра-патты-санум, насати, савсыр хансат супн юнтуңкве ат рөви. Төва хансат хум хөтпат супн, мөтаныт туп ныврамыт ос нэ хөтпат супн юнтавет.*

Ты вәрмалит тав сака пүмщалахты, ань аквта щирыл мәнщи супыт

ханищтаңкве тах вуй-хаты.

Кина-охсат пөслы

Нижевартовский районт блнэ мәншат ханты нэ Таисия Василькова такви пөслум кина-охсат тот суссылтасанэ. Тав Варьёган пәвылт блнэ ханты ос ёрн мэхум пөслысанэ. Аквты кинат тав ащөйкатэ ныврамыт ёнгынудыт урыл потыр-ты, мөт кинат – анёкватэ суссылтас, ханты маснуд хумус юнтуңкве эри.

Ляпа рүтаныл урыл потыртасыт

Онтолов мәншат хөт-пат тәнки рүтаныл урыл потыртасыт. Тән пот-раныл «Наши голоса в истории Югры» нампа нэпакн вәрвёсыт. Суссыл-тап блум порат ты мәншат хөтпат тув ёхталасыт ос тәнки ляпа рүтаныл урыл потыртасыт.

Ты тәлан вуйхатам мэхум пуссын ләвсыт, тән кина пөслуңкве, мәнщи, ханты ййквыт ханищтаңкве, хурит пөс-луңкве ос сав мөт эрнэ вәрмаль элаль вәруңкве тах патэгыт.

Людмила ТЕТКИНА

Оматэ сәлыңколт яныгмас

Елена Павловна Соломина Ханты-Мансийск үст Өлы, тав сәв тәл округной Дом творчества колт рүпитас. Вәт сәграпнал э́тпос 11 хөталт Елена Павловна 70 тәлэ төвлыс. Ты кастыл тав э́тэ хөнтхатыгласүв, рүпататэ ос рүт мәхманэ урыл китыгласлүв. Нән ань э́лалы ты нэ потре ловиньтэлың.

– А́тям Павел Константинович Микумин сосса хөтпа, ханты хум, Томский область Александровский район юрты Летне-Киевские мәт 1932 тәлт самын патыс. Ты пәвыл Новоникольский сельский совет палт тұлым Өлыс, тот туп ханты мәхум Өлыс, ос манрыг тох намаявес, тавагт.

Омам Любовь Ефимовна саами нэ Өлыс, такви Өпарищ наме Стрелкова. Тав Кольский полуостров мәт Мурманский областыт Териберский пәвыл 1933 тәлт самын патыс. Колтәгланыл сәлың мәхум Өлыс, омам мәнәтәгыл э́рнколт яныгмас.

– Омагың-әтягың хөт акван-хөнтхатасыг?

– Тән Ленинград үст лүйи мир Институтт акван-хөнтхатасыг, 1952-1953 тәлт. Тув тән ханищтахтүңкве минасыг кос, ос а́тям а́гмыл хартыс, ханищтахтын мәныл та пөйтсыг, Ханты-Мансийск үсн йисыг.

1954 тәлт ам тыт самын патсум. Та порат а́тям комсомольский пүтөвка щырыл Нижневартовский район Корлики пәвылн «Красный чум» колн рүпитаңкве кетвес, тув та Өлмыгтасүв. Омам тот ныврам садикт пүңктотыс. Корлика пәвылт 1957 тәлт Серёжа а́пщим самын патыс.

Тувыл омагум-әтягум ювле Ханты-Мансийск

үсн вәнтлыссыг, тыт сас медучилищат ханищтахтасыг, а́тям фельдшерский отделеният, омам – акушерский.

Тыт 1960 тәлт мәнә а́пщим Матвей самын патыс. Омагум-әтягум округувт сәв тәл пүльницат лөккарыг рүпитасыг, Өвлэт Ханты-Мансийск үст, тувыл Ларьяк пәвылн кетвесыг. Школан Өвыл классын ам Ларьяк пәвылт минасум.



Елена Павловна, омаге-әтяге, Сергей ос Матвей а́пщияге ос рүт а́гирищаныл

Э́тылнуве мән колтәгылыңыщ а́тям яныгмам мәтән Томский областын минасүв. Ам тот школа а́стласум ос Томск үст Өлнэ культурно-просветительский училищан ханищтахтүңкве минасум, оркестровый отделениан. 1973 тәлт училище а́стласум, Александров-

ский районт Өлнэ Новоникольский культура колн рүпитаңкве кетвөсум. Ты район Нижневартовский район ляпат Өлы, границатән аква.

Тот ат тәл рүпитасум, 1978 тәлт Челябинск үсн минасум, тот государственнй институт культуры колт нила тәл

ханищтахтасум. Направление щырыл Ханты-Мансийск үсн кетвөсум, тыт творчества округ колн патхатасум.

Хум вәрсум, наме Борис Николаевич Соломин Өлыс. Тав руц хөтпа, Ханты-Мансийск үст яныгмас, техническийтэла торыг рүпитас. Тав хосат

әтимыг өмтыс. Мән китпыг янмалтасмөн, Александр ос Михаил. Тән сас э́лалы Санкт-Петербург үст ханищтахтасыг, ань тыт Ханты-Мансийск үст Өлэ, рүпитэ, колтәгылыңыг өмтсыг.

– Елена Павловна, төнт творчества округ колт мәнәщи ос ханты хөтпат рүпитасыг?

– Тот ам вәт нупыл кит тәл рүпитасум. Сәвсыр мәхум рүпитасыт – округ сосса мәхманув, руц хөтпат, пуссын сака өмас, сымың мәхум Өлыс.

Культурно-просветительский колнак күщаиг Людмила Ивановна Кобрик Өлыс, тав Өйкатэ Владимир Васильевич Кобрик «Хорам» наппа э́ргын-ййквнэ ансамбль тармыл пүңктотыс. Тувыл «Миснэ» ансамбль Өлыс, тот мәнәщи ос ханты нэквет э́ргысыт.

Округной Дом творчества колт сака өмас нэ Нина Никитична Секисова рүпитас, тав «Миснэ» ансамблит Өс э́ргыс. Фольклорный отдел колнак тармыл Еремей Данилович Айпин тав пүңктотыс. Декоративно-прикладной творчество колнак күщаиг Михаил Ефимович Бронников Өлыс.

Тувыл мәнәщи ос ханты ләтың ханищтан курсыт вәрыглавөсыт. Мәнәщи ләтың Тамара Сергеевна Мерова ханищтас, ханты ләтың Валентина Николаевна Соловар. Тән палтән щәнь ләтың ханищтахтүңкве сәв хөтпат э́хталасыт.

Ам Өвлэт методистыг рүпитасум, округ янытыл сәвсыр мән кетыглавөсүв, сәвсыр семинарыт вәрыгласүв, э́ргын-ййквнэ мәхум вәрум тәланыл



Оматэ 5 тэлэ, ёрнколт



Любовь Ефимовна мәнһ лёккар



Оматэ саами маснутыл Өлы

суссану́в. Тох рупитамум щирыл ам округ янытэт яласаслум, яныг усытт ос мәнһ павлытт Өлсум, сав махум ёт хонтхатыгласум, вайхатасум.

Та талыт сака пумщит Өлсыт. 1993 талт Ханты-Мансийск уст финно-угор махум мирхал фестиваль Өлыс. Мир сав маһныл ёхталасыт. Мән ялпың хөтал щёпитым, хурум этэ-хөталэ пуңканув ёл ат пинтлысану́в, махум маттем та муйлысыт. Юи-өвыл хөтал Долина ручьёв мат концерт Өлыс, сав маһныл ёхталам махум танти эрганыл эргысыт, ййкваныл суссылтасаныл.

Аквата талт ам творчества кол куцаиг паттувёсум, тот 22 тал рупитасум. Ань пенсият Өлэгум. Та пора ам ёмас номтыл номылматалылум, ань сав хөтпа атим. Аквьёт рупитам төва хөтпанум ёт хонтхатыглёв, потрамёв. Ты ятил махумн ам пумащипа латың лавёгум, маһемас аквьёт рупитасу́в, сав тал пус кат, пус лагыл вос Өлэгыт.

– Наң лавсын, атян ханты хум, такви латңе вастэ?

– Вайм, вастэ, потыртас. Тан латңаныл ваховский диалектыг лававе. Тав яныгмам павлэн ялсу́в, тот щашёквав Өлыс Марина Матвеевна Микумина.

Номилум, мәнһ порат тав палтэ ёхтысу́в, тав маһнав маһньапыл урыстэ, аһнум ос аһщим талттысаге, Летне-Киевские павылн та минёв, тав тови. Руц латңыл потыртаңкве ат хасыс, атяв ёт ханты латңыл потыртасыг. Ам тувыл латңён мощ торгамтаңкве патыслум.

Өпав хөнтлын нак порат юн атимыг ёмтыс, ағмыл хартыс, пусмалтаңкве ат вёрмувес. Ос щашёквав атятэ Матвей тай мощ Өлыс, таве васлёв, савпыльталыгёмтыс. Мән ётув ханты латңыл потыртас, матыр вёви, мән тавён та хайттёв, тотыгпёв. Төнт ам 14 талум төвлыс, сатыт класс асласум, 1968-1969 талыт порат. Ақвум, атям увщитэ, Валентина Константиновна Микумина ань тыхөтал мус Новоникольский павылт Өлы. Тынакт тав 81 талэ төвлыс, юрнэтэ ёт Ас ят хул лышллёг.

Атям школат ты павылт ханищтахтас, Летне-Киевские павыл мус нёлолов вёрыста. Тувил тав Ханты-Мансийский педучилищан кётвес, тот матрыг ат ханищтахтас, тара элалё Ленинград усн кётвес.

Омагум-атягум Ханты-Мансийск уст Өлмён порат, атям радио хосыт ханты латңыл, ваховский диалектыл потырталыс. Потранэ корреспондентытн ёл-хансыглымат, ань тав турсуе хунтамлалылум.

– Оман такви латңе, улпыл, Өс вастэ?

– Тав маһньтагыл салыңколт яныгмас, тот пуссын саами латңыл потыртасыт, латңе атхунё вастэ, потыртас. Школан минаме порат руц латңыл ат потыртас.

Ёмашакв ханищтахтаме магыс Ленинград усн кётвес, тот ты атям ёт акван-хонтхатасыг. Мән маһньтагыл омам яныгмам мятэн Мурманский областын акваг тотыглавесу́в, ам няврамагум ёт тув Өс ватихал яланталсум, анёкватэн рут вагтэн.

Хунё атям атимыг ёмтыс, 1987 талт, омам такви яныгмам мятэн Териберка павылн Өлмыгтас. Төнт анёквам Анна Михайловна иң Өлыс, тав саамыт эргыт сака нётнэг эргыс, таимагыс акваг Мурманск ос Ленинград усыгн эргуңкве вёвиньталвес. Ань омам, анёквам ос төва рут махманум атимыт. Павланыл оссувлавес, махум мот мән Өлмыгтасыт.

Таи салё, ань манти латңанув соймуңкве та патсыт, нявраманув ёт руц латңыл потыртёв. Ань, улпыл, туп салы урнэ махум ос вёр мат Өлнэ колтагылты щанё латңыл потыртёгыт.

Ань потрумён та оигпас. Елена Павловна сымың, нёмса элумхөлас. Мән, «Лүймә сәрипос» газета вәрнэ хөтпат, Елена Павловна нам хөталёт янытлылу́в! Сав тал пустагыл вос Өлы, сөтыңыщ, щуниңыщ вос Өлы!

Светлана РОМБАНДЕЕВА

Сәвсыр мөйтөт щирыл сәккарың нянь вәрөгөт

Санкт-Петербург үст яныг таквс Этпос оигпан хөталыт ос вәт сәграпнал Этпос нөлолов щисла мус «Мир пряника» нампа мирхал фестиваль вәрыглавес. Тув 300 мәщтыр хөтпат 108 ұсытныл 4 мөт хөн мәныл мәхум ёхталасыт манос ищхйпың ут хосыт рүпитасыт.

Юлия Кутнякова Пряничный Университет кол бньщи, тав сәв мәхум ты тәлан ханищтыянэ, сәвыңпәлэ ищхйпың ут хосыт акв лялт потыртэгөт, хұлтыглахтэгөт. Ань ос фестивальн пуссын аквөт атхатыгласыт.

Мән округувт пряник вәрнэ мәхум ос ты кастыл формат пәрт тармыл ёргашлан хөтпат акван-нөтхатнэ Гильдия блы, руц щирыл тох ләвияныл – «Гильдия мастеров пряничного дела и знаменщиков Югры». Ты мәхум округувт халанылт ханищтахтэгөт, аквөт рүпитэгөт. Знаменщикыт – ты пәрт тармыл хурит ёргын хөтпат.

Наталья Грибачева мөлты тәл Мә-вит ос

Элумхблас музейт «Тёплые сказки» нәпак урыл ам потыртамум порат тув ёхталас ос мәньщи, ханты мөйтөт щирыл тамле пряникыт вәруңкве тахмаяс. Тав «Курт куся» (Пәвыл кұщай) ханты мөйтөт щирыл тит пряникыт вәрыс, тәнәтән нөтнэ хурил сәккарың ольпыл, руц щирыл глазурь ләваве, пөслысаге.

Титытнэ Елена Сербина Лянтор ұсныл «Хәрбөйка ос мәпорс» мәньщи мөйтөт урыл яныг пряник вәрыс. Тот яныг сәлы ос мәпорс татем нөтнэ пөслумаге, ты мәгыс тав «Витражный пряник» номинацият бвыл местал майвес.

Татьяна Паульс Горноправдинск пәвылныл «Хумус Виткащ-әги пыгөн

нэ тотыс» мәньщи мөйтөт хосыт нөтнэ пряник вәрыс. Ты мәньщи мөйтөт хуньт ам омам Аксинья Степановна Мерова мөйтөт-тыгластэ, ам таве нәпакн хансылум ос мөйтөт «Тёплые сказки» нәпакн вәрвөс. Татьяна ловиньтастэ ос татем тахмаяс тувыл хури виңкве ос атың нянь, пряник, вәруңкве.

Наталья Грибачева ос Татьяна Паульс ты вәрум нянянән мәгсыл диплом-нәпакыл майвесыг, нэг номтанән татем ёмасыт. Наталья хунь Ханты-Мансийск ұсн ёхтыс, Татьяна вәрум пряник әнумн мүйлуптастэ, ам таве ань нөтнэ хури холыт сунсыглым бньщилум.

Наталья ләви, атың нянь вәруңкве тав әти хосат ханищтахтуңкве бвылтахтас ос ты сака пұмыщ ос ёмас вәрмалы. Ищхйпың ут хосыт тамле рүпәтал пұмшалахтын хөтпат хөнтыс ос халанылт хұлтыглахтэгөт, хумус няняныл ёмцакв вәруңкве, хумус колас матыр тәнүтыт ёт тәлыгтаңкве ос тувыл кұрныл хунь оснывыганыл, пөльнэтэ юипәлт сәккарың ольпыл хури пөслэгөт. Төва порат пряник хотты лөмтэ хотсаквалаңкве вөрми, таве тән ос акв ювле ләщлаквөг ханлыяныл. Сәвсыр колыт хурип, аныт хурип пряникыт вәрөгөт, тувыл хорамтыяныл.

Фестивальн ёхталам мәхум «Репка», «Аленький цветочек» ос мөт руц мөйтөт хосыт пряниканыл вәрыс. Мән округувныл матьёмас мәньщи ос ханты мөйтөт виңкве тахмаясыт, ты мөйтөт Санкт-Петербургыт сака пұмшалавөсыт.



Т. Паульс ос Н. Грибачева

«Тёплые сказки» нәпакн Россия янытыл блнэ сәвсыр мирыт мөйтөт хансым өлэгөт, төват щань ләтңыл хасвөсыт ос ты коныпал аудио-потыт тот хунтлуңкве ос рөви. Тамле нәпакн мөйтөт Екатерина Кравченко ос Александра Агафонова акван-атсаннән ос Москва үст «Pres-Pass» издательстват тәратавөс.

Галина КОНДИНА

Мәньщи латың толмашлан нэпак тәратавес

Ханты-Мансийскт ӯс Ӓс-угорский институтт рӯпитан мәньщи нэ хөтпа Светлана Алексеевна Попова, такви бпарищ наме Анемгурова, мәньщи-рущ ләтңыгтыл толмашлан нэпак хансыс. Ань нэ ханты ос мәньщи мӒхум акван-атыгласанэ, такви тәратам нэпаке урыл потыртас.

Светлана Алексеевна блнэтэ палытыл китсӒт арыгтем научный рӯпата хансыс ос тәратас. Та нэпакыт ялпың хөталыт, мәньщи мӒхум блнэ-хүлнэ накыт, Ӓй ййквнэ накыт ос мөт тэлат урыл хансыс.

Ты нэ ХӒльӯс район НӒх-щамвөль пӒвыл школат нөлолов класс Ӓстлас, элаль ос ХӒльӯс школат ханищтахтас. Тувыл Салехард ӯс училищан нэпак ловиньтан колт рӯпитан хөтпаг ханищтахтүңкве минас. Ӓстламе юи-пӒлт тӒра рӯпитаңкве Ӓвыл-тахтас.

1993 тӒлт тав ХӒльӯст сосса мир Ӓлупса элаль тотнэ архив-кол пӯнсыс. Тот лов тӒл рӯпитас. Щар ӒвлӒт Кульпасн, Хулюм-сүнтын ос СаранпӒавылн ялантас. Тот яныгпӒала мәньщи хөтпатныл пӒс ййс потрыт, мөйтыт, Ӓм-щит ос эргыт хансыс. Ӓвыл щӒс пӒвылн ялан-таме порат, ома тӒн нӒт-вес. Ома тӒ тав Ӓтэ яла-сас, хулыглас тӒ: маныр китыглаңкве рӒви, маныр ос ат рӒви.

Светлана Алексеевна толмашлан нэпак урыл тох лӒвыс:

– Ам ты нэпак вӒрнэм элы-пӒлт, вӒтахкем тӒл ХӒльӯс район янытыл яласасум, сӒв мәньщи хөтпа Ӓт потрамасум. СӒв потыр Саквья вӒтат блнэ

СаранпӒавыл мәньщит-ныл хассум. Тувыл Ясунт пӒвыл «МӒнь Ӓскве» нампа нӒврамыт ӯщлах-тын мӒт сӒв яныгпӒала хөтпат Ӓт хӒнтхатыгласум. ТӒн потраныл пуссын нэпакн хансыгласанум. ХӒльӯсныл Ӓвылтахтүңкве ке, Шайтанка, Восыңтур, Ӓнъя, Сортыңья, Кульпас, Потрасуй, Кимкьясуй, Няхлаң, МӒнья-сүнт пӒвыл ос ТүрвӒт пӒвлытын ялсум.

Светлана Алексеевна лӒвме щирыл, мӒк та яныгпӒала хөтпат потра-ныл хосыт, тав ань тол-машлан нэпак тӒратаңкве вӒрмыс. Та мӒхум тав Ӓмщакв номиянэ ос вӒганэ, кӒсың хөтпа урыл хоса потыртаңкве вӒрми. ТӒва хөтпат урыл элаль ловиньтӒн:

ТӒпсвӒтпӒавылт акв кол ӯнлыс. Тот Ӓстин Анемгуров Ӓкватэ Ӓт Ӓлыс. Ӓстин Ӓйка акваг вӒраим яласас.



Ӓс-угорский институтт атхатыглам мӒхум



С.А. Попова потырты

Хунь мӒколыңӒйка кӒ-тын-патталас, тӒн эква-тӒнтыл тӒнкирот кит хөтпа Ӓй ййквсӒг.

Константин Васильевич Самбиндалов 1917 тӒлт ЯныгпӒавылт самын патыс, тав щар яныгпӒала хөтпаг Ӓлыс. Тав пӒлтэ туи порат Ӓхталас. Хум мөйтыт, Ӓм-щит ос тӒлыглапыт урыл сӒв потыртас.

Татьяна Романовна Садомина ос сӒв пӒс потыр потыртас, эргыт эргыс. Ты нэ Светлана Алексеевна Кульпас пӒвылн Ӓй ййквнэ накн вӒвиньтӒлыстэ. Тав Ӓтэ Кимкьясуй ос Хулюм-сүнт пӒвлыгн ялыс.

Елена Кирилловна Сетова тавӒн ос Ӓтимыг Ӓмтум хөтпа Ӓл-щӒпитан урыл потыртас. Ты эква Няхлаң пӒвылныл Ӓлы.

Екатерина Яковлевна Анемгурова ос нӒврам самын патнэ вӒрмалы урыл потыртӒлыс. Ты нэ Хулюм-сүнт пӒвылныл

Ӓлыс. ТӒнт пӒвылт лӒккар хөтпа Ӓтим Ӓлыс, нэ мӒнь нӒврам самын патнэ мӒт нӒтыс. Ты коныпал ос мӒт сӒв мәньщи хөтпат нӒт-мил вӒрсыт.

Светлана Алексеевна ты мәньщи лӒтңыт ос потрыт хосыт ань толмашлан нэпак ты щӒпитас. Нэпак тӒратан порат тавӒн пӒс ййс блнэ вӒрмалит элаль тотнэ тӒлат доктор нам Ӓщнэ хөтпаг Виктория Ивановна Сподина, Александр Георгиевич Киселев ос культуроло-гият кандидатыг блнэ нэ Любовь Васильевна Кашлатова научный рӯпата вӒруңкве нӒтсыт.

Яныг пӯмашипа лӒтың мәньщи филология кан-дидатыг блнэ нэ хөтпан Мария Владимировна Кумаеван лӒвыс. Тав мәньщи лӒтңыт толмаш-лан нэпакн Ӓмщакв хас-санэ.

Ты нэпакт ниласӒт на-лыман нупыл сӒт лӒтың хансым Ӓлы. Акв ӒвлӒт нӒквет блнэ-хүлнэ, пӯри вӒрнэ, мӒнь нӒврам са-мын патнэ, хөтпа Ӓл-щӒ-питан тӒлат урыл тол-машлан лӒтңыт хасвӒсыт. МӒт пӒлӒт ос пӒс ййс Ӓлум вӒрмалы урыл потрыт. Тыи яныг вит вӒрнэ нак, нӒрыт, элумхӒлас мӒт мӒн вӒнтлын тӒла, пӒс ййс мӒхум ос мӒт вӒрмалит урыл хансым Ӓлы.

Николай МЕРОВ

Агиришит-пыгришит ялпың хөталыл вәрыглавёсыт

Советский ўст няврамыт ўргалан кол олы, «Вуйкан пуңкуп лүпта» ләваве, ос руш ләтңыл наме «Ромашка». Кәсың тәл вәт сәграпнал этпос 10 хөталәт мән округув намхөталә янытлаве. Ань Югра мав 94 тәлэ төвлыс, та хөталт мирн матыр хүлтмалтәлыглаңкве эри.

Мән «Лүймә няврамыт» программа оныщев, ты вәрмалъ «региональный компонентыг» ләваве. Ты хосыт ялпың хөтал вәрыгласув. Няврамыт ўргалан колт рупитан хөтпат Югра мав урыл «Любознайки» емас программа щепитасыт. Татьяна Николаевна Спасенникова пүмаш сценарий хансыс, тав яныгнув няврамыт эт ос тыт рупиты.

Тав ләвыс:

– Няврамаквет, сосса мәхмыт ты мят пёс йис пора тәгыл олэгыт, нявраманыл янмалтэгыт. Ойкат вбраегыт, савсыр уй катын-паттэгыт, хул алышлэгыт, тох тәнки щемьяныл тыттыяныл.

Ос хоты мәхум сәлы оныщевыт, тән ос сәлытэпың мә кинсым яласэгыт. Ты хөтпат сака мутраң ос апрыңыг олэгыт,

сәлы тынщәныл пувуңкве вёрмэгыт. Тамле мәхмыт «Торум няврамыг» ләвавет.

Татьяна Николаевна няврамытын мөйт мөйтсы:

– Пёс йис порат Торум лүймә нумыл минас, кәтаге сака пөльвесыг, тонт савсыр щеланэ ёлпатталасанэ. Тав такви нупылэ кантмаявес, манрыг тох емтыс. Торум ёлпатталам савсыр щеланэ, кёлыг мәл, яныг вөрың мәл лап-пантсанэ, хоттуйтсанэ.

Ос туи порат сав мәнуйит ос лёмвуит ты щёлың мә уральтаңкве кетсанэ. Ты вәрмалъ пёс йис порат олыс. Ань мән олнэ порав ёхтыс, мән вәглув, ты мә мә-вөй ос мөт щёлыт оныщи.

Ты юи-пәлт няврамыт Югра мә урыл емас стихыт ловиньтасыт. Элалъ



А. Зайцева



Д. Белова

«Ләхыс, пәкв ос пилкве» ёнгыл ёнгалтавёсыт. Тән аквтупмат вөрн ёхтысыт, ләхыс атсыт, пил вәтсыт. Агиришит-пыгришитн тох ёнгуңкве сака пүмашиг олыс.

Елена Хайдарьяновна Заболотова котиль группан ялантан няврамыт ёт рупиты. Тав сака кәркам мәнщи нэ, ёрнкол юнтуңкв, матыр нэпак хансуңкв, тав матыр-әти пуссын вәруңкве хасы. Төва порат мән унтылматәлэв, пуссын аквьёт нэпакыт якытлапёв, эрнэ ләтың хансэв, хурит пөслэв. Тувыл няврамытн мән ос тамле емас мөйт суссылтэв.

Элалъ няврамыт «Тарыг пилкве» мөйт суссылтасыт. Тән таргыг, порыгпанэкваг, сөврыг, охсарыг масхатасыт, та ёмыгтэгыт саңквлы пөхыт, саңквлыпил кинсэгыт. Няврамыт ань вәганыл, пёс сосса мәхум тарыг товлыңуй сака ялпыңыг ошсаныл ос ўргаласаныл.

Тувыл «Сөвыркве» мәнщи эрыг эргысыт, тәнаныл тох эргуңкве Дарья Ивановна Белова

ханищтасанэ, тав ос ты няврамыт ўргалан колт рупиты.

Дарья Ивановна ос няврамыт магсыл «Кук-кук» эрыгсов тән сәңквылтапыл сәңквылтастэ. Югорск ўсныл мәнщи нэ Анна Зайцева няврамыт янытлаңкве ёхталас. Тав тумраныл ёнгыс.

Ялпың хөтал оигпам элы-пәлт няврамыт ләввёсыт:

– Тыхөтал нән ёнгысён, эргысён, ләтың ләвсён, мөйт суссён. Пёс сосса мәхмыт нотыт палытыл йинэ ханьщувлым олупсал олэгыт, кәсың ялпың хөтал порат төрлөмт хәлын нэгултэгыт, мән ань ос пёс ләвим щирыл вәрёв, «Дерево желаний» тамле төрлөмт тув нэгёв. Емас номтыл, кәсащан вәрмалил вус олэгыт, рутанылн пус кәт, пус ләгыл ләвёв.

Тамле емас, пүмаш ёнгилыл округув янытлан хөтал кастыл «Вуйкан пуңкуп лүпта» колн ялантан няврамыт вәрыглавёсыт.

Дарья АМЕНТЬЕВА

www.khanty-yasang.ru



Ялпың хөтал порат

Ищхыпың ут хосыт пӧслым хурит нӧх-ялтӕгыт

«Хӧтал» нампа Ӓс-угорский театр тынакт ищхыпың ут хосыт суснӕ спектакль суссылтасыт. Тӕн Митрофан Алексеевич Тебетев 100 тӕлӕ тӧвлуме кастыл «Хӕльӱс ӧлупса» («Берёзовские пейзажи») пӧслыглам хуриянӕ щирыл пӱмыщ суссылтап щӕпитасыт.

Ты йильпи ӕнгил спектакль-инсталляцияг лӕваве, таве режиссёр-хум Виктор Евдокимов вӕруңкве номылматас.

Митрофан Тебетев Хӕльӱст 1990-ыт тӕлыт ӧлме сыс 42 сӕвсыр хурит пӧслыс. Та хуриянӕт мӕхум ань кӕсалӕгыт, хумус мӕ-витӕ ялты, сосса мӕхум ӧлупсаныл хумле ӧлыс ос пӕс колыт халт йильпи колыт ӱнттавет, нӕинӕхӕпыт ӱрим мӕхум я нӕлми вӕтатӕт лӱляхӧ-лӕгыт.

Ань ты тӧва хуриянӕ яныг яңк тӧрын вӕрвӕсыт, мӕхум тӕн нупыланыл сунсым, ӧвлӕт матыр суйит хӱнтамлӕгыт, тувыл хурин пӧслым утыт илт-тыг нӕвсуңкве патӕгыт.

Нӕинӕхӕп рӧңхувлӕлым ӕлалы минмыгты, хӕпыт ӧс хотталы та нӕтантӕгыт, пӧслым ӕлумхӧлас, ӕрт-там, матыр лӕви манос ӕманты, акв хум хӧтпа лувуң суныл пӕвыл хосыт та минмыгтас. Тамле накыт пуссын ищхыпың утыл вӕравет, таимӕгы ань ты ӕнгил спектакль-инсталляцияг лӕваве.

Тувыл тӧва мӕт ӕрыг суй манос потыртанӕт

суйты. Вӕти потыр-охсат ӕрн хум Юрий Вӕлла нӕпакӕныл висыт. Юрий Кылевич тӧва мӕнь потранӕ Тебетев пӧслум ху-

рит сунсыглан порат акв-тупмат щар тув рӧвӕгыт. Артистат ань тӕнаныл ловиньтым тув вӕрсаныл, тувыл ӕргыт ӕргысыт.

Тот «Тоя уи» («Туя уи» – Тӕгт мӕньщит лӕтӕаныл хольт) ос «Хӧтал уи» Надежда Андреевна Тынзянова, Ӓс мӕньщи нӕ, вӕрум ӕрганӕ ӕргавет. Ӓква хосат ӕтимыг ӕмтыс ос тав ӕрганӕ Раиса Бардина «Песни обских

манси второй половины ХХ века» хансым нӕпакӕт ӧлӕгыт.

Виктор Евдокимов, режиссёр-хум, лӕвыс: «Ты ам ӕрталыхтым мӕгыс ӧвыл ищхыпың ӕнгил щӕпитасум. Ӑвлӕт хоса номсахтасум, хумус ос маныр рӧви вӕруңкве. Тувыл сосса мӕхум хансум потрыт, ӕргыт ханищ-таңкве патсанум, юи-ӧвыл тамле пӱмыщ номтын ӕхтувӕсум.

Ань мӕньлат мӕхум сыре-сыр искусстват мӧт щирыл пӱмщалӕгыт, тӕн акторыг матыр хӱнтлуңкве ос сунсуңкве таңхӕгыт. Таимӕгыс ищхыпың ут хосыт театрыт рӱпитан хӧтпат ӕнумн ӕмщакв нӕтсыт. Тӕнанылн пуссын яныг пӱмашипа лӕтың лӕвӕгум».

Ань мӕхум театр-колун ӕхталанӕныл порат «Берёзовские пейзажи» йильпи щирыл щӕпитым ӕнгил ищхыпың утыт щирыл акваг сунсуңкве рӧви. Тӕн экранын хащтӕл пӧс «куар-код» нупыл щӕпт ӧщнӕ телефонаныл вӧс тактыяныл ос тӧнт пӧслым хурит аквтуп нӧх-ялтӕгыт.

Тамле пӱмыщ спектакль аниматор-хум Валерий Голубцев, суит ӕл-хаснӕ хум Вадим Ломатченко, хурит ос ӕрнӕ пормасыт акваг-атнӕ нӕ Татьяна Муравьӕва вӕруңкве нӕтсыт. Тувыл сӕвсыр мӧт рупатат Евгений Пономарӕв, Александр Катило, Дмитрий Мицкий ос Сергей Ермаков ӕмщакв щӕпитасыт.

Тамара МЕРОВА



Хурит тох суссылтавӕсыт



Лүймә сәрипос
(Северная заря)
№ 24 (1330), 19.12.2024
Соучредители
Дума, Правительство
ХМАО – Югры
Издатель
Департамент внутренней
политики
ХМАО – Югры

Редакция
Главный редактор –
Алексеева Н.Г.
Телефон (3467) 33-17-52 (д. 500)
Заместитель главного редактора –
Кондина Г.Р.
Телефон (3467) 33-17-52 (д. 501)
Ответственный секретарь –
Узель В.В.
Телефон (3467) 33-17-52 (д. 504)

Адрес редакции и издателя:
628011, г. Ханты-Мансийск,
ул. Комсомольская, 31
тел./факс (3467) 33-17-52 (д. 510)
E-mail: gazeta@khanty-yasang.ru
Газета размещена на сайте
www.khanty-yasang.ru
Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы 04399, 54399
Тираж 1710 экз.
Заказ 5550
Цена свободная
Мнение авторов
публикаций не
обязательно отражает
точку зрения редакции.
Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.
Свидетельство
о регистрации
ПИ №ТУ 72-00795
от 23 января 2013 г.

12+



А.Ю. Фальченко касуңкве ёхталам пыгыг ёт



Н. Сухих

Хум соссa нъяврамыт касуңкве ханищтыянэ

Александр Юрьевич Фальченко ёт ам таквсы Сургутский район Белый Яр павылт хонтхатыгласум. Тонт тав Нижневартовский район Варьёган ос Новоаганск павлыгт ёлнэ нъяврамыт касуңкве тув тотыгласанэ.

Ты руц хум агирищит, пыгрищит сáлың сун ұлтта поргуңкве, тыньщаң рёпыгтаңкве, ошща ййв-ёвыл ёт хайтыгтаңкве ос акв маныл элал порыгмаңкве ханищтыянэ. Такви рупататэ тав таи потыртас:

– Нижневартовский район янытыл туп Варьёган ос Новоаганск павлыгт ёлнэ нъяврамыт соссa мэхум щирыл касуңкве ханищтавет. Ты кит павлыгт ёлнэ агитпыгыт тыг ань тотсанўв. Варьёган павылт 30 арыгкем нъяврамыт ам палтум ялантёгыт. Юи-ёвыл тáлыт нъяврамыт ты касылыл сака ат пумщалахтёгыт ос сáлың сун ұлтта поргуңкве, тыньщаң пáхвтуңкве ат кáсащёгыт.

Ты элы-пáлт Нижневартовский районт сáв ханты ос ёрн щёмьят вóрт

сáлы ўрим, вóраим ос хўл алыщлым ёлсыт. Ань ты мэхум павылыл ёлуңкве вáнтлэгыт.

Ам палтум ханты, ёрн нъяврамыт ханищтахтуңкве ёхталэгыт. Матахкем тáл ювле хультум порат пыгыт вóрт сáлыяныл ёт ёлсыт, тыньщаң мáнь тáгыл кáтыт пувсыт, сáв щёс сáлың сун ұлтта порыгмаңкве вёрмысыт.

Ань соссa нъяврамыт павылт яныгмёгыт, сáлыт ос тыньщаң шар ат вáщиньтэгыт. Хумус тыньщаң вáраве, ёвлэт тáнанылн потыртэгум, хумус рёпыгтаңкве эри – суссылтэгум. Мáнь ань «финский» лáвнэ тыньщаң ёвтэв, тамле утыл нъяврамыт ханищтыянўв. Сáлы совныл вáрим тыньщаңыт ёвтуңкве ёс сака ат вёрмёв, сáлың мэхум тыт ань воссыг áтим, хотьютын тамле утыл

вáравёв? Тымáгсыл юи-ёвыл тáлыт «финский» лáвнэ тыньщаңыл рёпыгтаңкве ханищтыянўв.

Александр Юрьевич палт ялантан нъяврамыт сáвсыр каснэ мáт вáтихал нёх-патэгыт. Таквсы Сургутский районт ёлум касылыт тав палтэ ханищтахтын пыг **Николай Сухих** 14-15 тáл яныт пыгыт халт ёвыл места вис. Николай такви урётыл таи лáвыс:

– Ам Нижневартовский район Варьёган павылт ёлэгум. Ам мáньтáгыл Александр Юрьевич Фальченко палт касуңкве ханищтахтэгум. Мáнь лов хóтпа тыг ёхтысўв. Ам ань 9 классыт ханищтахтэгум. Соссa мэхум щирыл касуңкве омамн ос áтямн лáввёсум. Тэнь хунь нъяврамыг ёлсыг, ёс аквты щирыл касуңкве ялантасыг. Омам ханты нэ, áтям – руц хум. Омам кáсың туй мáньхáпыл товункве яланты, тот акваг ёвыл места вуйлы. Ам сáлың сун ұлтта поргуңкве ос ошща ййв-

ёвыл ёт хайтыгтаңкве сака хáсэгум. Тыт ам 431 щёс сáлың сун ұлтта порыгмасум ос ам янытум пыгыт халт ёвыл места висум. Тамле касылыл Александр Юрьевичин вáтихал тотыглавёв, ам Ханты-Мансийск, Нижневартовск, Сургут ұсытн командав ёт ялсум.

Тамле ёмас, кáркaм нъяврамыт Александр Юрьевич палт ханищтахтэгыт. Руц хум рупататэ эруптытэ, сака ёмашакв вáритэ, тав «Заслуженный деятель физической культуры и спорта ХМАО-Югры», «Отличник физической культуры и спорта РФ» ос мóт яныг намыт ёныщи.

Александр Фальченко лүймáнь мáньлатыг ёлме порат ёхтыс. Ос сáлың сун ұлтта поргуңкве, тыньщаң рёпыгтаңкве, сáграп пáхвтуңкве ханищтахтуңкве тыт патыс. Тонт тав Новоаганск павылт ёлыс ос соссa хóтпат ёт Россият янытыл касуңкве ялантас ос вáтихал ёвыл места вуйлас. Ётыл нъяврамыт ёт рупитаңкве патыс, ань вáт арыгкем тáл соссa агирищит ос пыгрищит касуңкве ханищтыянэ.

Людмила ТЕТКИНА